




經籍典第六卷

經籍總部彙考六

明

太祖洪武元年冬十月詔收祕書監典籍圖書及求民間遺書十一月建太本堂命取古今圖籍充其中延儒臣教授太子諸王經書按明朝開天紀洪武元年冬十月戊寅詔曰祕書監國子監太

史院典籍太常法服祭器儀衛及天文儀象地理戶口版籍應用典故文字已令總兵官收集其或遺散民間者赴官送納卽位之初制作禮樂修明典章興舉廢墜定郊祀建學校崇儒術育賢才罷黜異端表章經籍上初不識書每臨朝暇延接儒士講論經典又取古帝王嘉言善行書之殿廡出入觀省凡詔誥命令揮筆立就或命侍臣立榻下操觚授辭滾滾千言皆淳雅高簡洞達物情戒諭臣下動引經史諄切懇至聽者咸動訓勅子孫臣庶具有成書足法萬世按明紀事本末至正

二十六年夏六月命有司訪求古今書籍藏之祕府以資覽閱因謂侍臣詹同等曰三皇五帝之書不盡傳于世故後世鮮知其行事漢武帝購求遺書六經始出唐虞三代之治可得而見武帝雄才

大略後世罕及至表章六經闡明聖賢之學尤有功于後世吾於宮中無事輒取孔子之言以觀之如節用而愛人使民以時真治國良規孔子之言誠萬世師也洪武元年二月庚午命選國子監生侍太子讀書十一月辛丑建大本堂取古今圖籍充其中延儒臣教授太子諸王以起居注魏觀侍太子說書

按焦茲國史經籍志序太祖高皇帝伐燕首命大將軍收祕書監圖書及太常瀋服祭器儀象版籍既定燕復詔求四方遺書

按明外史懿文太子標傳洪武元年正月立爲皇太子建大本堂取古今圖籍充其中徵四方名儒教太子諸王分番夜直選才俊之士充伴讀帝時時賜宴賦詩商確古今評論文字無虛日又命東宮及王府官編輯古今行事可爲監戒者訓諭太子諸王

按魏觀傳洪武元年建大本堂命侍太子說書及授諸王經

按陶凱傳洪武初授翰林應

奉教習大本堂授楚王經

按明會典太祖命學士宋濂授皇太子諸王經書于大本堂

按

春明夢餘錄文淵閣係中祕藏書之所明初伐燕詔大將軍收祕書監圖書典籍太常法服祭器儀衛及天文儀象地里戶口版籍既定燕詔求遺書散民間者

洪武二年四月命孔克仁等授諸皇子經十月詔郡縣立學校士專一經

按明外史孔克仁傳洪

武二年四月命孔克仁等授諸皇子經功臣子弟亦令入學

按明朝開天紀洪武二年冬十月

辛卯詔郡縣立學校士專一經以禮樂射御書數設科分教

按明紀事本末冬十月辛巳詔天

下郡縣皆立學上諭中書省臣曰學校之設名存實亡兵革以來人習戰鬪朕謂治國之要教化爲先教化之道學校爲本今京師雖有太學而天下學校未興宜令郡縣皆立學于是詔郡設教授一訓導四生員四十人州設學正一訓導三生員三十人縣設教諭一訓導二生員二十人學者專治一經以禮樂射御書數設科分教務求實才頑不率者黜之

洪武三年詔開科取士試五經四書義舉劉崧經明行修召見奉天殿

按明朝開天紀洪武三

年四月己亥詔曰朕聞成周之制取材于貢士故賢者在職而其民有士君子之行是以風俗淳美國易爲治而教化彰顯漢唐及宋科舉取士各有定制然但貴詞章之學而不求六藝之全至于前元依古設科待士甚優而權豪勢要之官每納奔競之人辛勤歲月輒竊士祿所得資品或居舉人之上懷材抱德之賢恥于並進甘隱山林風俗弊壞今朕統一華夏期與斯民共享昇平之治所慮官非其人有傷吾民願得君子用之自洪武三年八月爲始特設科舉以取懷材抱德之士務在經

明行修博古通今文質得中名實相稱其中選者朕將親策于廷觀其學識品其高下而任之以官
果有材學出衆者待以選擢使中外文武皆由科舉而選非科舉毋得與官敢有遊食奔競之徒坐
以重罪以稱朕責實求賢之意鄉試會試第一場試五經義各試本經一道易主程朱氏注古注疏
書蔡氏傳古注疏詩朱氏傳古注疏春秋左氏公羊穀梁胡氏張洽傳禮記古注疏四書義一道第
二場試禮樂論誥表箋第三場試經史時務策一道第三場畢後十日面試騎觀其馳驟便捷射觀
其中數多寡書觀其筆畫端楷律觀其講解詳審殿試時務策一道出身第一甲第一名從六品第
二名三名正七品賜進士及第第二甲正七品賜進士出身第三甲正八品賜同進士出身高麗安
南占城等國如有經明行修之士各就本國鄉試貢赴京師會試仕官已入流品及曾于前元登科
仕官并有過罷閒官吏娼優之人並不得應試科舉取士務全材但恐開設之初騎射書筭未能徧
習今科且免試候三年後須全備方許中選於殿設科取士期必得于全材任官惟能庶可成于治
道 按明紀事本末己亥詔設科取士定科舉格初場各經義一道四書義一道二場論一道詔
誥表箋內科一道三場策一道中式者後十日以騎射書筭律五事試之詔曰成周之際取才于貢

士賢者在職民有士君子之行漢唐宋科舉但貴詞章不求德藝前元設科取士權家勢要結納奔競賢者恥與並進甘隱山林自今八月爲始特設科舉務在經明行修博古通今其中選者朕將親策于廷觀其學識第其高下而任之非由科舉者毋得爲官許高麗安南占城諸國以鄉貢赴試于京師

按明外史劉崧傳洪武三年舉崧經明行修召見奉天殿

洪武五年命書大學衍義于殿之兩廡按明外史宋濂傳洪武四年爲禮部主事明年遷贊善大夫帝嘗問以帝王之學何書爲要濂舉大學衍義乃命大書揭于殿之兩廡頃之御西廡諸大臣皆在帝指衍義中司馬遷論黃老事命濂講析講畢因曰漢武溺方技之學喜塞外之功民力旣敝然後嚴刑督之臣竊謂人主誠以禮義制心則邪說不入以學校治民則禍亂不興刑罰非所先也又問三代以上所讀何書對曰上古載籍未立人不專講誦君人者兼治教之責以躬行率之則衆胥化矣

洪武六年帝御奉天殿論經學趙俶請以正定十三經頒示天下按明外史趙俶傳洪武六年徵至論經史貫串古今除國子博士帝御奉天殿召俶等曰經學必宗孔子母以儀秦縱橫俶請以正

定十三經頒示天下屏戰國策及陰陽識卜諸書勿列學官

洪武八年以朱廉授楚王經 按明外史文苑趙壘附傳朱廉字伯清義烏人洪武初除翰林編修八年授楚王經遷楚府右長史

洪武十四年三月頒五經四書于北方學校八月訪求明經老成儒士是年賜楚昭王楨經史 按

明朝開天紀十四年春三月丙辰頒五經四書于北方訪求明經老成儒士 按明紀事本末十

四年春三月上以北方自喪亂後經籍殘缺命頒五經四書于北方學校 按明外史楚昭王楨

傳楨太祖第六子十四年就藩武昌帝賜楨經史

洪武十五年五月訪求經明行修之士九月鄭韜等入見是年李原名以通經儒士舉爲御史 按

明朝開天紀洪武十五年五月丁丑勅天下郡縣訪求經明行修之士九月經明行修之士鄭韜等

三千七百人入見 按明外史李原名傳李原名字資善一稱彥名洪武十五年以通經儒士舉

爲御史

洪武 年命諸儒考補國子監藏書板刻 按明外史秦達傳有趙俊者不知何許人自工部侍郎

進尙書帝以國子監藏書板刻歲久殘剝命諸儒考補工部督匠修治俊奉詔監理古籍始備洪武

十七年免官

按此條當是十七年以前事

洪武十七年春三月頒行科舉試經書義成式

按明紀事本末十七年春三月戊戌頒行科舉成

式凡三年大比鄉試試三場八月初九日試四書義三經義四四書義主朱子集注經義詩主朱子集傳易主程朱傳義書主蔡氏傳及古注疏春秋主左氏公羊穀梁胡氏張洽傳禮記主古注疏十二日試論一詔誥章表內科一十五日試經史策五禮部會試以二月與鄉試同其舉人則國子學生府州縣學生暨儒士未仕官之未入流者應之其學校訓導專主生徒罷閒官吏倡優之家與居父母喪者不許入試

洪武十八年詔選小秀才編類經籍命劉三吾等刊定制作勅修諸書

按明朝聖君初政記十八

年三月十四日聖旨憑禮部選小秀才編類陳蔡二傳

按明外史劉三吾傳洪武十八年以茹

瑄薦召至帝銳意制作而宿儒凋謝得三吾晚悅之一切禮制及三場取士法多所刊定三吾博學善屬文帝製大誥命三吾序洪範注成亦命序勅修省躬錄書傳會選寶宇通志禮制集要諸書皆

古今圖書集成
總其事書成賜資甚厚帝嘗曰朕觀天象奎壁間有黑氣今消矣文運其興乎卿等宜有所述作以稱朕意

洪武二十三年詔購遺書以劉三吾授晉世子經 按明朝開天紀洪武二十三年十二月詔購遺書 按明紀洪武二十三年十二月購遺書福建布政司進南唐書金史蘇轍古史 按明外

史劉三吾傳洪武二十三年授晉世子經吏部劾其怠職降國子博士

洪武二十四年六月丁卯頒書籍于北方學校 按明朝開天紀云云

洪武二十六年召門克新問經史 按明外史任亨泰傳鞏昌門克新由薦舉爲泰州教諭洪武二十六年帝召問經史及政治得失直言無隱授左贊善紹興王俊華以善文辭授右贊善上諭吏部曰左克新右俊華重直言也

洪武二十八年校正經書刻板給天下學校 按聖君初政記二十八年校正尙書會選孟子節文刻板給散天下學校

建文帝建文二年命王良等類次祕閣書目 按明外史王良傳良字敬止吉水人建文二年進士

授翰林院修撰設文史館居之類次祕閣書目諸大著作皆綜理之

成祖永樂元年命金幼孜等讀書東宮先具經義呈帝覽時進講經史于帝前 按明外史金幼孜傳成祖卽位翰林坊局臣講書東宮皆先具經義閣臣闕正呈帝覽乃進講解縉書楊士奇易胡廣詩幼孜春秋 按解縉傳成祖入京師擢侍讀命與黃淮楊士奇胡廣金幼孜楊榮胡儼並直文淵閣尋進侍讀學士已而胡廣出爲祭酒縉等六人時進講經史從容獻納帝常虛己聽之

永樂二年帝御文華殿與楊士奇講論經義 按春明夢餘錄永樂二年上御文華殿大學士楊士

奇以大學講義進上覽而善之因諭帝王之學貴切己實用先儒謂克明峻德一章一部大學皆具

士奇曰堯舜禹湯文武聖人凡修諸身施於家國天下者皆大學之理誠聖學所當先務

按此條雖專言大學

而經義皆具爲有明一代文華殿講經之始故錄之總部

永樂四年三月上視學祭酒胡儼等講經四月購求遺書閏七月勅下南安郡邑勿毀文籍圖書

按明朝肇運紀永樂四年三月辛卯朔上謁孔子皮弁四拜視太學祭酒胡儼等講經明日上爲文刻石四月求遺書閏七月勅下南安郡邑勿毀文籍圖書 按明紀永樂四年上問文淵閣經史

子集皆備乎解縉對曰經書粗備子集多闕上曰古人家稍有餘貲皆欲購書況朝廷而可闕乎令

擇通知經籍者四出購求

按春明夢餘錄永樂初問文淵閣書籍皆備否召禮部尙書鄭錫令

擇通知典籍者四出購求且曰書籍不可較價值惟其所欲與之又曰置書不難須常覽有益

按鄭錫一

作鄭賜未知孰是

永樂五年十一月永樂大典成帝爲製序是年遣胡濙巡天下頒御製諸書

按明朝肇運紀永樂

五年十一月太子少師姚廣孝等進重修文獻大成更賜名永樂大典上爲序略曰命文學之臣纂

集四庫之書及購募天下遺籍上自古初迄于當世旁搜博採彙聚羣分著爲奧典以氣天地之始

也有氣斯有聲有聲斯有字故用韻以統字用字以繫事揭其綱而目必張振其始而未具舉包括

宇宙之廣大統會古今之異同巨細精粗粲然明備其餘雜家言亦皆得以附見蓋網羅無遺以存

考索使觀者因韻以求字因字以考事自源徂流如射中鵠開卷而無所隱始于元年之秋而成于

五年之冬總二萬二千九百二十七卷名曰永樂大典

按明外史陳濟傳成祖以修永樂大典

用大臣薦以布衣召爲都總裁而曾棨等爲之副詞臣纂修者及太學生數千人繕祕庫書數百萬

卷浩無端倪濟與少師姚廣孝等數人發凡起例區分鉤考秩然有法執筆者有所疑輒就濟質問應口辨析無滯書成擢右春坊右贊善濟謹慎無過皇太子甚重禮之凡稽古纂集之事悉屬濟隨事敷奏多裨益 按姚廣孝傳廣孝嘗與解縉等纂修永樂大典書成帝褒美之 按胡儼傳成祖

卽位拜國子監儼在國學凡朝廷著作多命儼修永樂大典爲總裁官 按曾棨傳棨預修永樂大

典爲副總裁官書成遷侍讀 按桂彥良附傳金寶開化人成祖卽位上書言治道帝嘉之復對策

稱旨除翰林典籍預修永樂大典選爲東宮講官 按王汝玉傳遷右春坊右贊善預修永樂大典

按劉季箴傳永樂初纂修大典以姚廣孝鄭賜監修命季箴爲之副

按鄭賜一作鄭錫

按陳敬宗傳永樂

二年進士與修永樂大典書成授刑部主事 按魏驥傳永樂中以進士副榜授松江訓導召修永

樂大典書成遷太常博士 按李昌祺傳永樂二年進士選庶吉士預修永樂大典僻書疑事人多

就質擢禮部郎中 按黃宗載傳永樂初爲湖南按察司僉事徵詣文淵閣修永樂大典書成受賜

歸任 按儒林張洪傳洪預修永樂大典進行人司副 按文苑林鴻傳鴻年六十餘與修大典書

成授翰林院典籍 按林鴻附傳王偁字孟敷永樂初用薦授翰林檢討與修大典學博才雄爲解

續所重王洪字希範授翰林檢討偕偁等與修大典歷修撰 按文苑沈度傳吳縣滕用亨初名權字用衡授翰林待詔與修永樂大典 按春明夢餘錄永樂中命解縉纂集類書爲文獻大成嫌

其未備乃命姚廣孝重修正總裁三人副總裁二十五人纂修三百四十七人催纂五人編寫二百三十二人看詳五十七人謄寫一千三百八十一人續送教授十人辦事官吏二十人凡二千一百八十人永樂五年十一月告成凡二萬二千二百一十卷裝成一千九十五本各以韻爲類賜名永樂大典貯文淵閣副本貯皇史宬 注 陸文裕深曰宋太宗平列國所得祿將之士最多無地以處

之於是設六館修三大部書命宋白等總之三大部者冊府元龜太平御覽文苑英華也御覽外又修廣記五百卷永樂靖難後復修永樂大典亦此意余按宋太宗詔諸儒編集故事一千卷曰太平總類文章一千卷曰文苑英華小說五百卷曰太平廣記醫方一千卷曰神醫普救總賜名曰太平御覽若冊府元龜一千卷乃眞宗編集也文裕所考或未確乎至靖難之舉不平之氣遍於海宇文皇借文墨以銷壘塊此實係當日本意

按明外史胡濙傳永樂五年遣濙巡視天下頒御製諸書 此另一事故附載于後

永樂 年五皇孫從陳濟受經 按明外史陳濟傳成祖修永樂大典用大臣薦以布衣召爲都總裁擢右春坊右贊善皇太子甚重禮之五皇孫皆從授經

永樂十二年十一月詔纂修五經四書性理大全 按明朝肇運紀永樂十二年十一月甲寅上諭行在翰林院學士廣侍講榮幼孜曰五經四書皆聖賢精義要道其傳注之外諸儒議論有發明餘蘊者爾等采其切當之言增附其下其周程張朱諸君子性理之言如太極通書西銘正蒙之類皆六經之羽翼然各自爲書未有統會爾等亦別類聚成編二書務極精備庶幾以垂後世命廣等總其事仍舉朝臣及在外教官有文學者同纂修開館東華門外

永樂十三年九月己酉五經四書大全及性理大全成帝御殿受之羣臣表賀 按明朝肇運紀云

云 按明外史楊榮傳永樂年征瓦剌太孫侍行帝命榮以間陳說經史比還北京命修五經四書性理大全書成宴勞之 按陳敬宗傳永樂二年進士授刑部主事與修五經四書大全授翰林侍講 按春明夢餘錄永樂中命儒臣集宋儒五經四書傳注纂修之其諸儒論說于傳注互發

足其所未備者分注其下不合者不取周官儀禮不課士置科不列書成賜名四書五經大全書諸

儒語錄足羽翼聖經者彙爲編賜名性理大全書

永樂十四年特命儀智侍皇太孫進講書史 按明外史儀智傳永樂十四年帝顧謂太子曰侍太孫講誦得人未太子應曰舉禮部侍郎儀智議未決帝喜曰智雖老能直言特命輔導皇太孫每進講書史必反覆啟迪以正心術爲本

永樂十九年帝幸北京命陳循取祕閣書詣行在既定都會三殿災楊榮出圖籍昇東華門外 按明外史陳循傳永樂十三年進士第一授翰林院修撰習朝廷典故帝幸北京命取祕閣書詣行在遂留侍焉 按楊榮傳永樂十八年進文淵閣大學士明年定都北京會三殿災將及祕閣榮磨衛士使出圖籍制誥昇東華門外帝褒賜之 按春明夢餘錄永樂辛丑命修撰陳循將南內文淵閣書各取一部至京計取書一百櫃載以十艘又遣官四出購買故閣中所積書計二萬餘部近百萬卷刻本十三抄本十七蓄積之富前古所未有也

永樂二十二年命嚴試歲貢生五經四書義取其明理者 按明紀事本末永樂二十二年命翰林院嚴考歲貢生上諭楊士奇曰百姓不蒙福者由守令匪人守令匪人由學校失教自今宜嚴試之

五經四書義不在文辭之工拙但取其明理者或人材難得卽數百人中得一人亦可蓋取之嚴則不學者不敢萌僥倖之望

宣宗宣德 年帝讀書必盡卷求經史治亂興亡之要陳祚請舉經筵 按明朝肇運紀上天資明睿讀書一目數行大義瞭然每覽必盡卷輒記不忘經史治亂興亡之要尤所留意文皇嘗諭曰讀書當求大義不可效儒生循行數墨徒費精神 按明外史陳祚傳時帝好宴樂頗留意狗馬聲

色祚馳疏勸勤聖學其略曰帝王之學先明理明理在讀書陛下雖有聖德而經筵未甚興舉講學未有程度聖賢精微古今治亂豈能周知洞晰真德秀大學衍義一書聖賢格言無不畢載欲致太平舍此不可願於聽朝之暇命儒臣講說非有大故無得間斷使知古今若何而治政事若何而得必能開廣聰明增光德業而邪佞之以奇巧蕩聖心者自見疎遠天下生民受福無窮矣

宣德二年上御文華殿與儒臣講論經義 按春明夢餘錄宣德二年二月御文華殿講孟子至二老歸文王章問曰伯夷太公皆處東海而歸文王及武王伐紂太公佐之伯夷叩馬而諫所見何以不同講官對曰太公以救民爲心伯夷以君臣爲重太公之心在當時伯夷之心在萬世無非爲天

下之生民也自此以後嘗進講舜典上曰觀二典三謨則知萬世君臣爲治之道不出乎此曆象日月星辰以閏月定四時天道以明治水土莫高山大川別九州任土作貢地道以成克明峻德以至協和萬邦人道以建九官十二牧所掌禮樂刑政養民之道後世建官繁簡雖不同要不出乎此當時君臣都兪吁咈更相告戒用圖治功氣象藹然何後世之不能及講臣對曰明良相逢故治化之盛如此上又曰天生聖人爲後世法孔子刪書斷自唐虞使人知有堯舜所謂萬世帝王之師也嘗進講春秋上曰聖人匡世之功憂世之心備見此書當時先王禮樂法度日以隳廢亂臣賊子接跡而起有此書而後天下知尊周嘗御文華殿出御書洪範篇及御製序文示楊士奇且曰朕在宮中雖寒暑不廢書冊士奇曰帝王勤學問則宗社生民有賴矣惟願始終此心

按進講舜典此三年二月事進講春秋此三年

十月事御書洪範此九年十二月事今皆附載于此以見宣宗崇尚經學之意

宣德四年上幸文淵閣與楊士奇楊榮論經史十月復幸文淵閣討論是年允衍聖公請命禮部市書與之按明朝英明紀宣德四年上幸文淵閣與楊士奇楊榮討論經史冬十月上幸文淵閣士奇與幼孜溥曾棨王直王英李時勉錢習禮陳循等侍上命典籍取經史披閱與士奇等討論以詢